

Evening Dogri News

20 June 2024

18:15 Hrs

Headlines

- प्रधानमंत्री नरेंद्र मोदी होर अज्ज द'ऊं दिनें दे जम्मू-कश्मीर दे दौरे पर आवा करदे ना। ओहू अज्ज केई विकास परियोजनाएं गी शुरू करोआंगन ते नौजवाने गी नियुक्ति पत्तर बी बंडडन।
- फौज नै आखेआ ऐ जे रफियाबाद टाक्करे च द'ऊं विदेशी आतंकवादिएं दा सफाया करियै बड्डी कामयाबी हासल कीती ऐ।
- देसै दे होरनें हिस्सें आला लेखा जम्मू संभाग च बी कल 10मां अंतरराष्ट्रीय योग दिवस पूरे जोश कन्नै मनाया जाग।
- राष्ट्रपति द्रोपदी मुर्मू होरें आखेआ ऐ जे संवेदनशीलता ते समग्रता स्हाडी संस्कृति ते सभ्यता दे महत्वपूर्ण अंग रेय ना।



PM-Visit

प्रधानमंत्री नरेंद्र मोदी होर जम्मू-कश्मीर दे द'ऊं दिनें दे दौरे तैहत अज्ज श्रीनगर पुज्जा करदे ना। श्री मोदी होर कल आयोजित होने आले 10में अंतरराष्ट्रीय योग दिवस दे कार्यक्रमें च शामिल होंगन। लगातार त्री बारी प्रधानमंत्री बनने परेंत उंदा प्रदेश दा एहू पैहला दौरा ऐ। श्रीनगर दी मशहूर डल झील दे कंडे पर स्थित **SKICC** च कल होन जा रदे योग कार्यक्रम च तकरीबन 7 ज्हार लोकें दे शामिल होने दी मेद ऐ। लेफ्टिनेंट गवर्नर मनोज सिन्हा होरें श्रीनगर च योग दिवस दा मुख् कार्यक्रम आयोजित करने ते एहूदे च शामिल होने लेई प्रधानमंत्री हुंदा आभार जताया ऐ। प्रधानमंत्री होर अज्ज संज्ञा श्रीनगर च 1500 करोड़ रुपें शा मते दिएं केई विकास परियोजनाएं दा उद्घाटन करंगन ते नीह पत्थर बी रक्खडन। इंदे च शिडक ढांचे, पानी सप्लाई योजनाएं ते उच्च शिक्षा ढांचे आले प्रोजेक्टे दा उद्घाटन शामिल ऐ। एहूदे अलावा श्री मोदी होर चनैनी-पत्नीटॉप-नाशरी शिडक दे सुधार, औद्योगिक एस्टेटें दे विकास ते 6 सरकारी डिग्री कालजे दे निर्माण आली परियोजनाएं दे नीह पत्थर बी रक्खंगन। मोदी होर राईबाई ते एदे नै जुडे दे खेत्तरे च मुकाबलेबाजी च सुधार मतल्लक 1800 करोड़ रुपें दी परियोजना गी बी शुरू करोआंगन। इस प्रोजेक्ट गी प्रदेश दे सब्बनें 20एं जिले दे 90 ब्लोके च लागू कीता जाह्ग ते एहूदा लाहू 3 लक्ख परोआरे दे 15 लक्ख लाभार्थिं गी थहोग। प्रधानमंत्री होर **SKICC** च युवाएं दे सशक्तिकरण ते जम्मू-कश्मीर दे बदलाव मतल्लक कार्यक्रम च बी शामिल होंगन। ओहू टकोहदी उपलब्धियां हासल करने आले जम्मू-कश्मीर दे नौजवाने कन्नै गल्लबात बी करंगन ते सरकारी खेत्तरे च भर्थी 2 ज्हार शा मते लोके गी नियुक्ति पत्तर बी बंडुगन। कल मोदी होर **SKICC** श्रीनगर च योग दिवस दे मुख् कार्यक्रम च शामिल होंगन ते किट्टु अग्गे भाषण बी देंगन। प्रधानमंत्री हुंदा दौरे दे मद्देनजर घाटी च सुरक्षा दे निग्गर प्रबंध कीते गेदे ना।



Encounter-JK

सुरक्षाबलें कल हादीपोरा रफियाबाद टाकरे च दऊं विदेशी आतंकावदिएं दा सफाया करियै इक बड्डी कामयाबी अपने नां कीती। इक संवाददाता सम्मेलन गी संबोधित करदे होई 7 सैक्टर राष्ट्रीय राइफल्स दे कमांडर दीपक होरें गलाया जे पिच्छले किश दिनें थमां उनेंगी सोपोर रफियाबाद च आतंकावदिएं दी मजूदगी बारै लगातार सूह हासल होआ करदी ही। कल बी इक पक्की सूह थ्होने परैंत पुलस, फौज ते सी.आर.पी.एफ नै इक सांझा अभियान चलाया ते दऊं आतंकावदिएं गी मारी-मुकाया जिंदा सरबंध लश्करे तैयबा गुट कन्नै हा। उंदी शिनाख्त उस्मान ते उमर दे तौर पर कीती गई ऐ। उस्मान 2020 थमां कश्मीर च सरगर्म हा। उनें दस्सेया जे टाक्करे आली थाहरै थमां खरी मती मात्रा च थेआर-असलाहू ते गोला-बरूद बरामद कीता गेआ ऐ। उनें दस्सेआ जे पिच्छले किश हफतें दरान उनेंगी खरी कामयाबियां हासल होआ करदियां न ते लोकें दा बी सैहयोग थ्होआ करदा ऐ।

<><><><><><>

World Refugee Day

रिफ्यूजियें सरबंधी कुल संसारी ध्याडा हर बरे 20 जून गी मनाया जंदा ऐ। एहू ध्याडा दुनिया भरै च रिफ्यूजियें दी दशा बारै जागरूकता पैदा करने ते मेजबान समुदाय च उंदी शमूलियत ते स्वीकृति गी बढावा देना ऐ। विश्व रिफ्यूजियें दिवस वैश्विक रिफ्यूजियें गी पेश आवारदी परेशानिएं दा हल तुप्रे ते उनेंगी उनें चुनौतियें थमां सुरक्षित बाहर कड्डने दी मेद कन्नै मनाया जंदा ऐ। एहू ध्याडा अंतरराष्ट्रीय सहयोग ते इकजुटता दे महत्व दा चेत्ता नुआंदा ऐ। विश्व रिफ्यूजी दिवस 2024 दा विशेसार ऐ इक ऐसी दुनिया जित्थें रिफ्यूजियें दा खुल्ले मनै कन्नै सौआगत होवे। रिफ्यूजियें दी सिंिति कन्नै सरबंधत 1951 आहली संधी दे 50 बरे पूरे होने दे चेत्ते च 20 जून 2001 गी पैहली बारी रिफ्यूजियें सरबंधी कुल संसारी ध्याडा मनाया गेआ हा।

<><><><><><>

IMD

भारती मौसम विभाग नै आखेआ ऐ जे अगले किश दिनें दरान उत्तर पच्छिम ते पूर्व मध्य भारत च मानसून ते तूफान औने कन्नै गर्मी दी स्थिति च कमी औगा। आकाशवाणी खबरें कन्नै गल्लबात करदे होई मौसम विभाग दे वैज्ञानिक सोमा सेन राय नै आखेआ ऐ जे मानसून दे औने कन्नै उत्तर प्रदेश गी छोडियै दक्खन-पच्छिम भारत दे मते सारें हिस्सें च गर्मी दे प्रकोप थमां किश राहत थ्होगा। डॉ. राय होरें इब्बी दस्सेया ऐ जे अगले त्रऊं-चऊं दिनें दरान गोवा, महाराष्ट्रा ते कर्नाटका च मती बरखा होई सकदी ऐ। वैज्ञानिक नै 21 तरीक यानि कल तगर कश्मीर घाटी दे किश हिस्सें ते जम्मू खित्ते दे किश हिस्सें च हल्की दर्जे दी बरखा दे कन्नै गरज-चमक ते तेज ब्हाऊ चलने दी पेशनगोई कीती ऐ। विभाग दे अधिकारी नै दस्सेया ऐ जे इस म्हीने दी 22 ते 23 तरीक थमां किश-किश थाहरें पर हल्की बरखा दे कन्नै बिजली चमकने ते बहल गरजने दी मेद बुज्झी ऐ। उनें आखेआ ऐ जे किश-किश पर 27 जून तगर मौसम खुशक रौहग पर किश थाहरें पर बरखा होने दी मेद ऐ। उनें आखेआ जे 22 जून थमां जम्मू खित्ते दे मदानी इलाकें च गर्म लू चलने दी संभावना ऐ।

<><><><><><>

IYD-Samba

देश दे बाकी हिस्सें आहला लेखा सांबा जिले च बी 10मां अंतरराष्ट्रीय योग दिवस मनाया जा करदा ऐ। आयुष मैहकमे आस्तै सब्भै तयारियां मुकम्मल करी लैतियां गेदियां ना। मुख् कार्यक्रम दा आयोजन सांबा दे स्पोर्ट्स स्टेडियम च कीता गेदा ऐ।



IYD-Jammu

विश्व योग संस्थान नै जम्मू दे हरकी पौढी थाहर अंतरराष्ट्रीय योग दिवस थमां पैहले इक कार्यक्रम दा आयोजन कीता जेदे च बद्द गिनतरी च लोकें योग सत्र च हिस्सा लैता। विश्व योग संस्थान दे मिम्बरें लोकें गी अपील कीती ऐ जे ओहू कल्लै आहले मुख् कार्यक्रम च हिस्सा लैन।



Doda-IYD

अंतरराष्ट्रीय योग दिवस मनाने दे सिलसिले च डोडा दे स्पोर्ट्स स्टेडियम च अज्ज योग सत्र दा आयोजन कीता गेआ। मुख् आयोजन 21 जून गी इस्सै थाहर ते भद्रवाह दे गाथा पार्क च कीता गेदा ऐ। डोडा दे डिप्टी कमिशनर हरविंद्र सिंह होरें लोकें गी शारीरिक ते मानसिक भलाई आस्तै योग सत्र च हिस्सा लैने लेई अपील कीती ऐ।



Rajouri

अंतरराष्ट्रीय योग दिवस 2024 दी तैयारियें च तेजी आई ऐ। भारती सेना नै राजौरी दे कब्जा रेखा कन्नै लगदे इंगी ग्रां च कुडियें गी योग दी सिखलाई देने आस्तै सिखलाई सत्र दा आयोजन कीता। बड़ी बद्द गिनतरी च इस इलाके दी कुडियें सिखलाई सत्र च हिस्सा लैता ते भारती सेना दा धन्नवाद बी कीता। कुडियें आखेआ ऐ जे असेंगी इस गल्लै दी मती खुशी ऐ जे प्रधानमंत्री नरेंद्र मोदी जम्मू-कश्मीर च अंतरराष्ट्रीय योग दिवस दे मौके पर हिस्सा लै करदे न ते एहदे कन्नै योग दे बारै च बड़ी मती जागरूकता पैदा होई ऐ।



Poonch-IYD

समाज कल्याण मैहकमे ते पुंछ दी तायक्वांडो एसोसिएशन नै रलियै पुंछ दे कृष्ण चंद्र पार्क च योग कैंप दा आयोजन कीता जेदे च बड़ी बद्द गिनतरी च तायक्वांडो दे खडारियें हिस्सा लैता। कैंप च लोकें गी अंतरराष्ट्रीय योग ध्याडे च बद्द गिनतरी च हिस्सा लैने ते योग गी अपनाने दी अपील कीती गेई ऐ।



President Divyang Students

राश्ट्रपति द्रोपदी मुर्मू होंरे अज्ज नमीं दिल्ली च दिव्यांगजनें लेई पंडित दीनदयाल उपाध्याय राश्ट्रीय संस्थान दा दौरा लाया। अपने इस दौरे दरान राश्ट्रपति होंरे दिव्यांग जागतें कन्नै गल्लबात कीती ते उंदे आस्सेआ पेश कीती गेदी सांस्कृतिक गतिविधियें दे साक्षी बने। उनें हड्डियें ते जोडें सरबंधी विकारें ते कृत्रिम अंगें सरबंधी केंद्र दा दौरा लाइयै उत्थे मरीजें कन्नै गल्लबात कीती। किट्ट गी संबोधित करदे होई राश्ट्रपति होंरे आखेआ ऐ जे कुसै मुल्ख जां समाज दी तरक्की दा मुल्ल उस मुल्ख जां समाज दे लोकें दा दिव्यांगजनें दे प्रति दस्सी गेदी संवेदनशीलता कन्नै पौंदा ऐ। राश्ट्रपति होंरे दिव्यांगजनें दे सामाजिक आर्थिक सशक्तिकरण दी दिशा च कम्म करने लेई संस्थान कन्नै जुडे दे सब्बनें लोकें दी सराहना कीती।

